ЛУИМА ественновеская газета


6 июня 2019 года №11 (1197)

Общественнополитическая газета Ханты-Мансийского автономного округа-Югры СЭРИПОС

www.khanty-yasang.ru

E-mail: gazeta@khanty-yasang.ru

Основана 11 февраля 1989 года



Ты номерт ловиньтэн:

Кущай нэ нила арыгкем щёс потыртас

2

Ялпын мат ўргалавет

4

Касын мир латне вос янытлаве

8

Финно-угор рутанув муйлункве ёхталасыт

12-13

Ёмас ялпын хотал янытлавес ЛЯХХАЛЫТ

Кущай нэ нила арыгкем щёс потыртас

Янк натнэ этпос 30 хоталэт округувт олнэ махум яныг кущай нэ Наталья Комарова савсыр вармалит урыл китыгласаныл. Нила щёс арыгкем Наталья Комарова кол ёвтнэ, мир пусмалтан, ханищтахтын вармалит, ЖКХ ос сав мот тэлат урыл потыртас.

Сав хотпа маньлат щёмьят магсыл рупитан программа урыл китыглахтасыт. Ты пирмайтым нэпак щирыл щёмьят кол ёвтнэ магсыл олныл таставет ос тыщирыл нётавет. Тувыл ты программан сака сав маньлат щемьят хасхатасыт. Сав тал урхатым това нэт-хумит 36 таланыл товлысыт ос программатныл хотщуртумтавēсыт. Māхум китыглахтасыт, тан нётункве патавет ман ати. Наталья Комарова лавыс, тан хоса номсахтасыт, хумус ты маньлат щемьят нётункве рови. Тан ань кол ёвтум ос ипотека-олн вим ос хурум манос тыгыл савнув няврамыт янмалтан маньлат щемьят субсидия-олныл тах тāстыяныл. Аквта порат кущай нэ сосса махум урыл латын лавыс. Сосса щемьят магсыл рупитан программан ос сав махум хасхатым олэгыт. Кущаит маньщи, ханты ос ёрн щёмьят аквта щирыл элаль нётункве патыяныл. Олнэ кол ёвтум ос ипотека-олн вим щёмьят сартын субсидия-олныл тастvнкве патавет. Ты йильпи латныл рупитан саккон ты тал маньполь этпост xacsec.

Махум йильпи школат ўнттын вармаль урыл китыглахтасыт. Ань това ўсыт ос яныг павлыт няврамыт кит смена щирыл ханищтахтэгыт. Наталья Комарова лавыс, ань округ янытыл яныгсат школа ўнттункве эри, тонт тыт олнэ āгирищит-пыгрищит пуссын акв сменат ханищтахтункве патэгыт. Ты халт туп Сургут ўст хус ханищтан кол ўнттункве эри. Тувыл ты эрнэ тэла нупыл сака сав олн эри. Округ кущаит ань Сбербанк ёт акванпотыртахтасыт, школат ўнттын магсыл ты банк сав олн минкве лавыс.

Кондинский районт олнэ мир Тюмень ўс нупыл машинал яласан лёнх урыл китыглахтасыт. Ман округув ос Тюменский область миркол кўщаит та районныл Тюмень ўс нупыл машинал яласан лёнх аквъёт варункве хосат тагыл потыртахтасыт.

Ман олнэ мавт ты лёнх варвес, ос Тюменский область миркол кущаит щар нэматыр ат варегыт. Наталья Комарова лавыс, ань Тюменский область миркол кущаит ты хосыт рупитанкве щар ат касащегыт, тыимагсыл тан ань Свердловский область миркол кущаит ёт потыртахтэгыт. Ты лёнх та область нупыл тах вараве, Кондинский районт олнэ мир машинал Екатеринбург ўсн нупыл яласанкве тах патэгыт. Ань кущаит ты кастыл савсыр эрнэ нэпакыт щёпитэгыт.

Округ янытыл олнэ мир савсыр вармалит урыл кущай нэ китыгласаныл. Наталья Комарован акв сотыра 300 арыгкем китыглахтын латын ёхтыс.

Людмила ТЕТКИНА

Олныт эрнэ ман макыг холтвесыт

Туя хоталыт оигпан порат мирн периим махманув яныг сапранит акван-атхатыгласыт. Овлэт тан намхоталаныл олум депутатыт янытласаныл, округ Дума кущайн Борис Хохряковын муйлупсал муйлуптавесыт.

Тувыл Вера Дюдина, округ олныт ловиньтан кущай нэ, 2018 талт олнанув хоталь холтвесыт, та урыл потыртас. Щар сав налок-олн ма-вой нох-винэ компаният ос савсыр мот рупата варнэ махум ойтсыт. Округув тал сыс Россия федеральный бюджетын 26% савит олн тетыс. Ёмщакв ойтхатнэв магыс тувыл федеральный грант-олныл майвесув, кущаит тананыл пуссын районыт ос ўсыт халт лакква-уртсаныл. Тал сыс нила щёс бюджет-олныт нох-нётвесыт. Савынпалэ мир пусмалтан, няврамыт ханищтан, олнэ колыт хот-щёпитан магыс холтвесыт ос пёс колыт, балокыт олнэ щёмьят олныл тастувёсыт.

Ань предпенсионерыг лавнэ махум магсыл саккон пирмайтавес, тамле хотпан Пенсионный фондыт справка винкве эри, ты нэпакломтэ хосыт тав ат тал сыс ос нётункве патаве.

Ханищтахтын ма́гсыл хансым округ сакконув това латнанэ ос мощ пентвесыт. Ань целевой щирыл хаништахтын няврам āстынэтэ юи-палт та организацият хурум тал матрыг рупитанкве ат те паты, тав штрафолн ювле ойтункве лававе. Ос това порат няврам ханищтахтын маныл асты, таве тетум организациян рупитанкве ёхты, тув ат виве. Тонт ос организация штраф-олн округ бюджетын ойтункве паттаве.

Хул алыщлан урыл сакконт «спортивное рыболовство» латныг хот-вуйвесыг. Борис Хохряков лавме щирыл, федеральный сакконт

ты латныг хосат хотщуртумтавесыг, таимагыс округ сакконув ос тащир хассаныл. Тот воссыг нэматыр ат пентхаты, нясыл хул алыщлан хотпат ос аквта щирыл няслункве патэгыт, нэмхотьютын тан пувункве ат патавет.

Мир пусмалтан магыс майлым олныт ос эрнэ щирыл холтвесыт. Ман округувн ват нупыл сат яныг леккар рупитанкве ёхтыс ос ты коныпал фельдшерыг лавнэ сат леккар рупитанкве патыс. Махманув танти олнэ манылт уральтахтункве вермегыт.

Галина КОНДИНА

ЛЯХХАЛЫТ

Аквъёт рупитанкве купнитнувег емты


Молал ляххал тотнэ колн Алексей Федяев ёхталас. Тав «Развитие Югры» нампа колт кущаиг рупиты. Ань округувт кооперативыт варавет. Уйхул ос товлын уй янмалтан махум, хул, пил, лахыс тастын ос тэнутыг щёпитан хотпат танки рупатаныл варнэныл магыс государство палыл нётавет.

Кущай хум лавме щирыл, махум рупатаныл мусхалыг вос варияныл, тананылн акванолтхатункве эри. Тыщир олн сэлункве купнитнувег паты. Матыр тарвит вармаляныл акван-нётхатым ёмщакв щёпитыяныл. Мот хон мат Европат ос Америкат танки рупатаныл варнэ хотпат хосат тагыл акван-нёт-

хатым рупитэгыт.

Ты фондың хотпат танки магсыланыл рупитан махум аквъёт рупитанкве вовияныл. Ты вармальн тананыл ханищтанкве патыяныл. Тувыл тан тэнутпормасаныл элаль тыналан магыс лапкат пунсункве ос нётэгыт.

Ты махум государство палыл 70 млн. савиткем олн-нётмилыл мивет. Ос



тот пуссын аквъёт лов арыгкем предприятият аквъёт вос рупитасыт, тонт ущ тан олныл нётункве патавет тах.

Ань округувт акванолтым лов кооператив рўпитэгыт. Тан халанылт щар ёмщакв «Ермак Агро» рўпиты. Молалнув тан Нижневартовский ўст лапка пўссыт. Варнэ тэнутаныл танки тыналыяныл.

Кооперативыт рўпитан хотпат субсидияолнаныл ишхипын ут ёвтнэ магыс холтункве вёрмияныл. Ты нётмил хосыт тан ёмщакв олн сэлункве патэгыт. Округувт манки махманув савнув тэнут тах варегыт, предприятият таксарнувег ёмтэгыт. Акван-нётхатым савнув олн сэлаве.

Николай МЕРОВ

Нявраманын ёмас хотпаг янмалтэн

Савсыр мирыт халанылт ёмщакв вос олсыт, вори ул вос тотсыт, округ мирколт Совет рупиты. Тот кущаиг округ губернатор нэ Наталья Комарова тав олы. Тан ватихал акван-атхатыглэгыт. Ань ты сапранит кина суснэ тотап хосыт округ янытыл рупитан махум тал сыс варум рупатаныл ос мот эрнэ тэланыл урыл потыртасыт.

Округ кущай нэ лавыс: «Югравт савсыр латныл потыртан мирыт олэгыт. Тыт ань пуссын аквъёт яныгсат арыгкем объединение няврамыт ёт рупитэгыт. Ты махум танки олнэхулнэ наканыл элаль тотэгыт ос мот мир нупыл ёмас самыл сунсэгыт. Ань ты накт щань латың элаль тотнэ магыс савсыр ханищтапыт щёпиталавет. Ты хосыт маньлат махум сакати вайхатэгыт ос халанылт юртыныщ олэгыт.

Мань таквс этпост Россия янытыл савсыр маныл махум муйлуң-кве Ханты-Мансийск усн ёхтэгыт. Ты вармаль мир аквъёт мусхал щирыл олнэ магыс щёпитаве тах. Маньлат

махум халанылт ул вос кантлэгыт ос нэматыр люль ул вос варегыт, туп ёмас хотпаг элаль вос олэгыт. Манавн пуссын аквъёт юртыныщ олункве эри. Тонт нэматыр тарвит вармаль ат ёмты».

Округувт «Мы – Россияне» нампа общественный организацият кущаиг олнэ нэ Юлия Тушкова такви рупататэ урыл потыртас. Тан маньлат махум ёт рупитэгыт. Касын тал агит-пыгыт савсыр хонтытн тотыглым хотпат ос яныг хонтыт хонтлум ветераныт ёт ващиньтахтэгыт. Няврамыт катыл савсыр нётнэ хурит послэгыт ос тананылн муйлуптэгыт. Ветераныт ос хонтлум нак урыл потыртэгыт,



хумус савсыр мирыт аквъёт ма ўргаласаныл, фашистыт алыщласаныл. Ты организация округ янытыл олнэ маньлат махум ос няврамыт магсыл савсыр эрнэ тэлат щёпиталэгыт.

Православный махум ялпынколт рупитан ой-ка Евгений Кизин тув ос ёхталас. Округувт тан савсыр тал яныт няврамыт ос тан щемьяныл ёт рупитэгыт. Военно-патриотический клубыт няврамыт ёт ващинтахтэгыт, тан

ётаныл савсыр тэлат урыл потрамегыт.

Тувыл Югра мат сав мусульман махум олэгыт. Ханты-Мансийск ўст мечеть кўщаяныл Рустам Аминов ос ты Советыт рўпиты. Манырсыр вармалит тан варыглэгыт, тав ты урыл ос потыртас. Ты махум танки нявраманыл ёмас хотпаг олункве ос акваг ханищтыяныл.

Николай НИКИТИН

ЛЯХХАЛЫТ

Ялпын мат ургалавет

Ман округувт савсыр кущаин колыт олэгыт, касынаныл янас рупата вари. Акв кол тох лававе – служба государственной охраны объектов культурного наследия ХМАО – Югры.

Ань ты колт рупитан хотпат тамле потыр тетсыт. 2012-2018 талыт сыс округувт това мат ялпыныг хасвесыт, тан ань сака такыщ ургаланкв патавет.

— Щохрың-ойка матэ, ты ялпың ма Хальўс район Тапсуй я ваталяпат олы.

— Нёр-ойка ос Щохрын-ойка манэн, ты ялпын маг Хальўс район Турват нампа тур ляпат олэг.

— Балбанты нампа тур, мот щирыл ос тох лававе — Еманглор. Маньщи латныл ты тур



- Яныг ялпың тўрыг лававе. Ты тўр сака ялпын. Тав Сакв таляхт блы, Нёранув ляпат. Тув пёс йис тагыл махманув пўрлахтункв акваг ялантасыт. Туп хум хотпатн тув рови, нэкветн ос агитн тув ялункв щар ат рови.

— Каль-нёхыс Найэква ос Тулям-ур-ойка ялпын маг, тэн ос Хальўс районт олэг. — Соровские озера, ты турыт Нефтеюганский районт олэгыт. Ос ялпыныг оньщавет.

Сургутский районт «Яун-ики-мых» нампа ма ос ялпыныг хасвес, ос ань ты хотал мус эрнэ нэпакыт ин ат варвесыт. Нэпаканыл ёмащакв хансыяныл, тувыл ущ ты ханты ма ўргаланкв тах патаве.

Ты 2019 тал овыл-

тахтам пасныл округувт олнэ ялпын мат ўргалан кол округ мирколныл олныл минкв ат патаве. Тан ань туп Российский Федерация реестр-нэпакн хансым ялпын мат ўргаланкв патыяныл.

Ты потыр маньщи латныл Валентина ВАСИЛЬЕВА хансыстэ

Тарвитын агм сав хонтвес

Мир пусмалтан департамент колныл тамле потыр ман газетавн тётвес. Тот рўпитан хотпат хассыт – округувт олнэ маньщи, ханты ос ёрн махум хумус пусмалтавет, лёккарытн хумус уральтавет.

Ань ман округувт олнэ махум намнэ-паканылт (паспортанылт) национальностяныл ат хансаве. Ос тан леккарытн янас уральтым оньщавет. Леккарыт ёмащакв ваганыл, мань павлын матт манах хотпа олы, тан халанылт хотьютаныл — маньщи, ханты манос ёрн хотпа.

Ювле хультум 2018 тал сыс округувт элы павлытт олнэ махум ос уральтавесыт, ты тэла рущ латныл лававе

— диспансеризация. Туи ос тэлы сыс хурум соты ратем сосса хотпа тан ёмащакв уральтасаныл.

Ос ань тамле тарвитын вармаль тарапаттувес. 796 хотпат пувласпи-агм оньщегыт ман ати, ёмащакв уральтавесыт. Ань тан халанылт 115 хотпа рак-агм ощнэныл. Мот махум тивраныл ос ёмащакв сусвесыт, 48 хотпа саханылт (кишечник) ос пувласпиагм хонтвес.

Ань ты хотпат пуссын яныг пульницан тетвесыт. Тот тан ёмащакв тах уральтавет. Агманыл, соль, молях те хонтавет, тонт тара пусмалтанкв патавет.

Молты туи сыс леккарыт «Николай Пирогов» наинхапыл 47 мань павлытн ялсыт. Тэлы сыс яныг машинал ос 14 павлытт олнэ махум суссаныл, тан туп тит этпос машинал яласэгыт. Туи тан наинхапыл ат этпос яласэгыт, ят хосыт миннэныл сыс касын мань павлытн паг-хоиглалэгыт. Пуссын аквъёт 41 сотыра арыгтем хотпа уральтасаныл.

Тот олнэ мир тананыл сака ўрияныл. Мир пусмалтан ос уральтан рупата коныпал тан «санитарный книжкаг» лавнэ нэпакыт, савсыр справкатварегыт. Тамле нэпак ощнэ хотпат рупатан тара вивет, нэматыр торасыл ат варавет.

Ты рупата ань таимагыс вараве, округувт государственный яныг программа-нэпак хансым олы, рущ наме ты – «Развитие здравоохранения на 2014-2020 годы». Ты программа щирыл ань сосса хотпат леккарытн ёмащакв уральтанкв ты патвесыт.

Мир пусмалтан департамент колныл тётым потыр маньщи латныл Валентина XO3YMOBA хансыстэ

МИР ПУСМАЛТАН ВАРМАЛЬ

Лёккарыт павлытн та нёвумтасыт





Новле хультум этпос юи-овыл хоталанэт Омск ўсныл Ханты-Мансийск ўсн «Николай Пирогов» нампа наинхап-капай ёхталас — плавполиклиникаг лававе. Элы лёнхын миннэтэ магыс тыт эрнэ тэрпил ёт щёпитавес, пусмалтан щанквыт, сыре-сыр ищхипын утыт тув талттувёсыт.

Ляххал тотнэ махум ёт Центр профессиональной патологии кол яныг лёккар Николай Ташланов хонтхатыглас, ман таве наинхап урыл китыгласлув. Хум тох потыртас:

– Ты тал пульницан наинхапув округт олнэ 45 павлытн ялы – Белоярский, Хальус, Кондинский, Октябрьский, Ханты-Мансийский, Сургутский ос Нижневартовский районыт янытыл яласанкве паты. Ты наинхапт леккарыт ань хотыт тал рупитанкве патэгыт. Тот рупитан магыс 19 колнак щёпитасув. Акв тысавит леккар олы – терапевт, хирург, сым, нёл, сам ос паль уральтан лёккарыт, анализыт ос рентген (флюорография ос лувнакыт послын ищхипын утыт) варнэ хотпат. Элумхолас тивре уральтан магыс савсыр машинат ос мот эрнэ пормасыт тув талттысув.

Наинхапт леккарыт яныг операция ат варегыт. Сунсэгыт, хотпа сака тарвитын те, тан тара санавиация вертолёт вовегыт, элумхолас хотты пульницан тотыгпаве. Операционный колнак тай атхунь олы, лавилув — «малая операционная». Тот мань нюлмит лап-юнтавет манос алписов агмыт тэрпил сартавет, леккар торыл лап-перавет.

Николай Владимирович китыглавес, лёккарыт хотыл олэгыт. Хум лавыс, товат Ханты-Мансийсканыл. матахмат хотпа Омск ўсныл ос мот маныл ёхтысыт. Наинхап тармыл пунктотнэ яныг лёккар Александр Котов Омск ўсныл олы. Ойка тот сав тал пульницат пунктотыс, тувыл тыг патхатас, сав тал ман округув янытыл яласы. Тан пуссын сака ёмас хотпат, варнэ рупатаныл эруптыяныл, мань павлытт олнэ махум ёт сымыныщ потраманкве хасэгыт. Таимагыс тан тув палыт ос я польнэ мус наинхапыл та яласэгыт, мань павлытт олнэ мир пусмалтэгыт.



«Николай Пирогов» наинхапт рупитан леккарыт молты тув сыс 6 сотыра 73 хотпа пусмалтасыт, тан палтаныл уральтахтункве 16 сотыра 666 хотпа ёхталас.

Наинхапув мощ ин рупиты

Ляххал тотнэ махум наинхап-капай урыл китыглахтасыт, лавегыт, тав улпыл песыг емтыс, ин та яласы. Николай Ташланов тох потыртас:

– Щар соль, тав мощёртн яласанкве ат тартаве. Ватихал уральталылув, матыр пес щанкванэ йильпииг щёпитавет, ольпыл сартаве. Касын наинхап яласан пора оньщи, «Николай Пирогов» ос аквтох. Ты урыл ман пусмалтан департамент колт яныг лёккарыт ос округ кўщаит ёт потыртасув. Тан ань номсахтэгыт, эрын йильпи наинхапыл варавев манос ёвтавев, тавагт.

Лёккарыт касын павылт ўравет

Ты Центр профессиональный патология кол ляххал тэланэ палт пунктотнэ хум Евгений Машаров ос акв-кит латын лавыс:

Наинхап овлэт Белоярский район Пашторы павылн ялы. Тувыл

элаль Хальўс районын мины — Саранпавыл, Лопмус, Кульпас ос мот павлытн хоиглы. Ань витэ онты, кос хот яласанкве вёрмёгыт, ос хунь тосы, това ман ат ёхтахтэгыт. Тан ваганыл, хоты я хосыт овлэт эри ялункве, ялнэ-миннэ лёнханыл нэпакын хансым оньщияныл.

Тыт рўпитан лёккарыт касын павыл мань леккарыт ос тот олнэ кущаит ёт телефон хосыт акваг потыртэгыт. Таимагыс ваганыл, ань касын павылт тан палтаныл манах хотпа уральтахтункве ёхты. Мань леккарыт павыл махманыл нупыл потыртэгыт, мощертн наинхап ёхты, тув ялункве вос щёпитахтэгыт. Павыл яныг те, наинхапын леккарыт тот нилах-атах хотал рўпитэгыт.

Това хотпат сыресыр справкат кинсэгыт, аква машинал яласан магыс эрнэ нэпак вари, мотан катерыл яласанкве номсы манос писаль ёвтункве танхи. Анализыт варнэ магыс келпаныл вивет, пунканыл-сыманыл, алпияныл, та маныр пуссын уральтавет. Ты юи-палт эрнэ нэпакыл ущ хансавет.

Светлана МАТВЕЕВА

ПАТШИНАХ

Щань латнанув урыл потыр

Янк натнэ этпос 21 хоталэт Ханты-Мансийск ўст щань латын ханищтан хотпат магыс хонтхатыглап варыглавес, тох намаявес: «Форум учителей родных языков коренных малочисленных народов Севера». Школат рўпитан сатлов арыгтем сосса махум сав маныл ёхталасыт — Хальўс, Белоярский, Сургутский, Нижневартовский, Нефтеюганский, Октябрьский, Ханты-Мансийский ос мот районытныл олсыт.

амле хонтхатыг-**⊥** лап ханищтап ос молодёжный политика ХМАО – Югры департаментыт ос «Институт развития образования» колт рупитан махум тан щёпиталсыт. Мак та урыл потыр олыс, ань школат щань латын ханищтан хотпат хумус рупитэгыт, матыр тарвит оньщегыт ман ати, эрнэ нэпакыт касын мат олы манос хотты школа мус ат тотыглавет.

Овыл латын ханищтап департамент кущай ванын нэ Лариса Цулая тав лавыс:

- Ханищтап саккон щирыл, Россия янытыл касын мат махум танти латнаныл ханищтанкве вермегыт. Ман, округ образование департаментыт рупитан махум, ань таи тара-паттэв, школанувт щань латын хаништан магыс аман

касың мат эрнэ нэпакыт ос ищхипың утыт олэгыт. Няврамыт ёт рупитан порат тыи-таи эри. Эрнэ матыр пуссын олы те, тонт учителитн купнит, няврамытн ханищтахтункве пумыщ, уроканылн щагтым ялантэгыт.

осса няврамыт ань **⊿**школан ёхтэ́гыт, савынпалэ рущ латныл потыртэгыт. Округ янытыл туп 7 садикт щань латын ханищтаве. Дополнительный образование колыт халт 8 мат латнанув хунтамланкве рови. Сунсэтен, ань округувт 418 садик рўпиты, 7 – ты сака мощща. Няврам такви латне юн ат те хулытэ, яныгман колт ат те ханищты, тав хумус щань латын ванкве паты. Белоярский, Хальўс, Сургутский ос мот мат олнэ школатт 1 сотыра




680 няврам танти латнаныл ханищтэгыт.

/анищтап депар-**1** таментыт р<u>ў</u>питан хотпат ос щань латын ханищтан учителит акван-нётхатым вос рўпитэгыт. Ты тэла палт пунктотнэ махум хунь ваганыл, нан манхурип тарвит оньщегын, нанан манарыл нётункве эри. Нётмил ўрегын те, латың кетэн, тэланын урыл потыртэн. Йильпи нэпакыт хансункве эри те, махум хонтэв, ты вармаль кастыл олн тастэв.

Учителит элаль ханищтахтункве танхегыт те, савсыр курсытыл вариянув, хотты мат акван вос хонтхатыглэгыт, рупатаныл овылтыт потыртэгыт, халанылт ханищтахтэгыт. Тох тан номтаныл такмалтэгыт, элаль ёмас номтыл рупитанкве патэгыт. Тыхотал хурип хонтхатыглапыт ватихал варункве патэв.

Ос мак таи урыл лавегум, ты мат олнэ няврамыт сосса махум латын пуссын вос ханищтэгыт. Кос рущ, таджик манос хатань няврамыт вос ваганыл, Югра ма – ты маньщи, ханты ос ёрн мир тан





йис тагыл олнэ мананыл. Ты лўи мат яныгман няврамыт сосса мирыт латнаныл ос культураныл вос ваганыл, вос янытлыяныл. Ты мат ам ват нупыл китыт тал олэгум, маньщи ос ханты латныг акваг хулыглэгум. Татем нётнэ, каминьт латныг, эрыг хольт овёг. Хумус тэнатэн ат ханищтанкве. Мот хон няврамыт ёт сымыныщ потыртанкве те, тан латын ванкве атхунь тахмаёгыт.

Тамле яныг тэла мутран учитель тал хунь вараве. Тан няврамыт ёт ёмас номтыл рупитэгыт те, мань махум кос хащтал латын ханищтанкве паты, мот мир олупса пумщаланкве паты. Сосса няврамыт ос тах танти латнаныл урок ущпылнэг эруптанкве патыяныл, щагтым тув минэгыт.

Шань латын хаништан ятил махум, нананн ам сав ёмас, сымын латын лавегум. Матъёмас нан тамле эрнэ рупатан вуйхатасын. Пуссын аквъёт рупитэв, ты яныг тэлав аквъёт варилув. Касын тарвитын нак порат элы хоталн агтункве эри, халанувт нётхатэв. Тонт сосса нявраманув ёмас номтыл ёмыгтанкве

патэгыт, тах лавегыт, щань латнаныл тан ваганыл.

Сав хотпа латын лавсыт. Тан халанылт округ кущай ванын хотпатэ палт советникыг олнэ нэ **Надежда Савина** потыртас. Тав ос та урыл лавыс, ань щань латын ханищтан хотпат матыр тарвит оньщегыт те, яныг кущаит палт вос минэгыт, потраныл хунтлавет, элаль аквъёт рупитэгыт. Нэ лавыс, тох олнэв магыс округув сав мат ваве, махум хулыгласыт, ман хумус рупитэв, касың элумхолас потре хунтамлаве, нётаве.

чосударственный **L** думат депутатыг олнэ маньщи нэ Тать**яна Гоголева** ты хонтхатыглапын латын кетыс. Ты урыл тавён нётнэ нэ Оксана Рыжкова потыртас: «Татьяна Степановна лавме щирыл, хотпа щань латне вагтэ те, тав нупылэ рови лавункве, ты маньщи манос ханты хотпа. Ань ООН организация нэпакыт щёпитэгыт, лов тал ма янытыл олнэ мирыт талыг вос лававе (рущ щирыл – Десятилетие родных языков коренных народов мира).

Новосибирск ўсныл



ёхталам профессор нэ Наталья Кошкарёва ханты латын урыл сака пумыщ доклад ловиньтас. Ты латын сав диалект оньщи, махум латнаныл акван ат ёхтэгыт, савсыр щирыл хансэгыт. Нэ лави, ханты мир ос учёный хотпат акван-потыртахтункве ат вермегыт. Ты магыс тан ань эрнэ нэпакыт ат хансэгыт, ўрхатэгыт, хунь акванпотыртахтэгыт.

аньщи нэтенув **IV**Ioc олсыт, махум элы-палт потыртасыт. Технолого-педагогический колледжит щань латын ханищтан маньщи нэ **Альбина Станис**лавец рупататэ овылтыт потыртас. Саранпавылныл Ольга Лелятова ёхталас, тав «Оленёнок» садикт мань няврамыт маньщи латныл ханищтыянэ. Лариса Карпенко Нижние Нарыкары павылныл олыс, тав школат ос ман латнув урок ханищты.

Ханты латың ханищтан хотпа сав олыс. Нэт мастер-классыт варыгласыт, потыртасыт, школат манос садикт хумус рупитэгыт. Учителит хунтлункве сака пумыщ олыс. Касынаныл урыл хоса потыртанкве рови. Тамле хонтхатыглап тыгыл элаль акваг варункве патаве, щань латын ханищтан хотпанув ёт тах ос касалахтэв.



Светлана РОМБАНДЕЕВА

ТАТШИНАХ

Касын мир латне вос янытлаве

Ты тал ма янытыл Щань латныт янытлан талыг лаввес, рущ латныл тох лававе – Международный год языков коренных народов мира. Ань ты кастыл Санкт-Петербург ўст А.И. Герцен нампа университетт сав намын-суин учёный хотпат, мощщаг хультум мирыт ос университетт рупитан махум акванатхатыгласыт.

ан тит хотал аквъёт **L** рўпитасыт. Овыл хоталт атхатам мирн яныг учёный нам ощнэ хотпат доклад-потраныл ловиньтасаныл. Овлэт ты университет кущай хум Сергей Игоревич Богданов тав потыртас. Тав лавыс, ань касын мир латне ўргаланкв эри. Тан университетанылт луима мирыт ханищтан магыс янас кол олы, тав тох лававе - Институт народов Севера. Тот онтырсат тал сыс сав хотпа ханищтахтас, ань тан халанылт учёный хотпат, няврамыт ханищтан махум сав олы.

Акв хум потыртаме порат, тав наме Е.В. Головко, тамле тарвитын

вармаль осн-паттыс. Тав наукат рупитанэтэ сыс нила мир латнаныл та соймысыт. Матах тал ювле хультум порат тав Аляска ма нупыл минас. Лёнхыт минаме сыс алеут мир латын вам юи-овыл хотпа тот атимыг емтыс. Россият ос туп нила хотпа алеут латын вагыт, потыртэгыт. Керек мир латын ос соймыс. Ань ты латныл щар нэмхотьют ат потырты.

Ты учёный лавыс, матъёмас Россия мат ань сака эрнэ кол рупитанкве патыс, тав лававе – Фонд сохранения и изучения родных языков народов Российской Федерации. 1991 талт яныг сапрани



варыглавес, та пасныл ань мощщаг хультум мирыт латнаныл ўргаланкв ты патвёсыт. Ос ты 2019 талт ты фондкол ты пўсвес, ань соймын латныт ханищтан магыс элаль сав рўпата тах вараве.

Титыт хоталт луима мирыт институт колт махум акван-атхатасыт. Тот лакква-уртхатым доклад-потрыт учёный махум ос ловиньтасыт.

Та колт рупитан маньши нэ Валентина Селивёрстовна Иванова (такви опарищ наме — Садомина) Куль-Отыр (ман лавев — Хуль-Отыр) урыл потыр щёпитам, таве мот мирн ловиньтастэ. Учёныитн сака пумыщ олыс, таве хоса титыгласаныл, манрыг тав тамле потыр хансыс.

льбина Романов-🔼на Станиславец ос маньщи латын ханищтан вармаль урыл потыртас, тан колледжит няврамыт хумус ханищтыяныл. Савсыр латныл хаснэ газетат урыл махум тот ос потыртасыт. Акв маньлат хум ань тох лавыс, щань латныл таратан газетат хосыт щар мак ёмащакв ты нанки, мощщаг хультум мирыт щань латнаныл хумус мотхурипаг емты, манхурип йильпи латныл тан хансэгыт. Ос та сыс пес латныт хотёрувлахтэгыт манос хот-оссувлавет. Ты яныг сапрани урыл потрыт мот газетат элаль тах хансыянув.





Валентина ХОЗУМОВА **ХАНИЩТАП**

Хальўс районт мань школат ёмщакв рупитэгыт

Хальўс районт мань павлытт нила школа няврамыт ўрнэ колын тагыл рўпитэгыт. Тан пуссын йильпи ўнттым колыт олэгыт, матыр-ати эрнэ утыл ос тотвесыт. Тот таи ёмас, мань няврамаквет нила класс мус юил ханищтахтункве ёхталэгыт, тувыл ущ мот ляпа павлытн элаль ханищтахтункве кетавет.

Сукыръя ос Кимкъясўй павлыгт олнэ мань школаг няврам ўрнэ колың тагыл Саранпавыл школа нупыл хасвесыт. Ос акв тамле колыг Лопмуст ос Шайтанка павлыгт олэг, акватэ Кульпас школа нупыл ос мотанэ Восынтур школа нупыл хансым олэг. Ань Восынтур павылныл Светлана Собянина латын кетыс, тан павланылт интернат атим, таимагыс Шайтанка павылт ханищтахтын няврамыт ётыл Тэк павылн кетавет. Ты тал тот кит няврам ханищтавег, Кимкъясуй павылт школан ос садикн атхуйплов няврам ялантэгыт.

Молал Лопмус школа овылтыт кущай нэ Татьяна Валерьевна Анямова китыгласлум. Тав лавыс: «Ты тал ман школавт кит няврам овыл классыт ханищтахтэг, хурум китыт классыт, хурмит классыт нэмхотьют атим ос нилыт классыт – кит няврамыг. Тан пуссын акв смена щирыл ат хотал ханищтахтэгыт. Эрнэ урокыт коныпал тан маньщи латын ханищтан щёсн ёхталэгыт, каркамыг ос апрыныг олнэ магыс «Югорка» нампа клубн ялантэгыт.

Школат хўрум нэ рўпитэв, Светлана Алексеевна Хозумова овыл ос нилыт классыг ханищты, Наталья Николаевна Таратова китыт класс. Ам тэнатэн тованакт пентыглыягум ос школат савсыр вармалит уральтыянум, ёмщакв щёпитыянум.

Няврамыт ўргалан колт Ирина Валерьевна ос Нина Николаевна Анямовыг рўпитэг. Садикн лов няврам ялантэгыт. Сартын савнув агирищ-пыгрищ садикн тотыглавес. Ос ань щань-ащаныл тыт рўпата ат ощнэныл магыс мот ман олункве вантлэгыт.

Школан ос садикн ялантан няврамыт тыт ёмащакв тыттавет. Тэнут тал ат хультупталавет, сыре-сыр фруктыл ос тотавет. СанПин палыл уральтанкве ёхталавев, ань тыг мус нэмат люль

ат хонтыгласыт. Ты тэлат манки пуссын ос акваг уральтым оньщиянув».

Татьяна Валерьевна 2011 талт ЮГУ астлас, тав рущ ос маньщи латын ханищтан нэг олы. Университет астламе юи-палт тав тара Лопмусн ювле ёхтыс ос овлэт няврам ўрнэ нэг рупитас, ётыл ты школат пунктотнэ нэг паттувес.

Ло́пмуст нила класс астлам няврамаквет Кульпасн элаль ханищтахтункве кетавет. Тот молты талт йильпи школа-интернат ўнттын маныл астлавес, матыр варнэ ос эрнэ колнакыт пуссын оньщи, няврамыт кон польтахтым ат хайтыгтэгыт.

Сукыръят олнэ мань школа овылтыт кущай нэ Тамара Савельевна Ванюта тох лавыс: «Ты талт тыт хурум няврам ханищтахтэгыт, акв няврам овыл классыт ос китыг - китыт классыт. Тан Евгения Гриценкан ханищтавет. Садикн атхуйплов няврамакве ялантэгыт. Тан ётаныл кит воспитатель-хотпаг рупитэг ос кит хотпаг тэнут пайтэг. Ман ханищтан, леккарлахтын, тэнут пайтнэ вармалит пуссын акв колувт олэгыт, тыи сака ёмас». Сукыръя школа астлан няврамаквет Саранпавылн элаль ханищтахтункве тотыг-

Тамара МЕРОВА





СОССА МИР КУЛЬТУРА

Пёс махманув щирыл мащтырланкве эри

Ханты учёный нэ Татьяна Молданова нуйныл юнтым пормасыт урыл Ханты-Мансийск ўст «Ма-вит ос Элумхолас» нампа музей-колт потыртас. Ты вармаль мащтыр махум союзаныл ос ты музей-колт рўпитан хотпат аквъёт варыгласыт. Ты элы-палт Татьяна Александровна энтапыт, пункторыт ос сасныл варим пормасыт урыл потыртанкве тув вовыглавес.

ес порат маньщит, хантыт **⊥**эрнэ пормасаныл танки юнтсаныл ос варсаныл, нявраманыл мащтырланкве маньтагыл ханищтасаныл. Ань маснутыт, пормасыт лапкат ёвтэгыт, агияныл ос пыганыл воссыг ат ханищтыяныл ос морсын хотпат мащтырланкве тох хасэгыт. Товат нуйсахин, супын яныг хорамыт ос савсыр хансат юнтункве овылтахтасыт. Хоты хансат нётнэг олэгыт, супын та варапияныл. Пёс порат аги тох ке варыс, яныгхотпан тара лаввес, тох юнтункве ат рови, тав хунтлыс ос эрнэ щирыл варыс. Пес йис вармалит ванэ махум ань мощща хультыс ос маньлат хотпат ты тэла урыл торын ат вагыт. Хантыт нуйсахи хурум сыр хорам юнтнэ торыл, ос маньщит китсыр торыл юнтыяныл. Ань нэ хотпат хумус тахмаёгыт, тох та варапёгыт.

Музейт нуйторыл юнтым маньщи, ханты сав пес пормасыт акван-атым олэгыт. Татьяна Молданова ты пормасыт суссылтасанэ ос хумус тан юнтвесыт,

та урыл потыртас. Овлэт тав юнтуп тущтын утыт суссылтас. Тав лавыс, пес порат юнтуп тущтын ут нуйныл юнтвес, еранэ пуның совыл варвесыт. Хорамың магсыл акв похлапыл ос котильн хансал юнтвес. Аквпал ерт таныт сасумтан магсыл лунт манос хотан марк лув варвес. Пес порат ханты нэквет ханса пентсыл пёрна юнтыгласыт. Ётыл ущ хансал юнтункве патсаныл. Нэквет акваг юнсхатсыт, ты юнтуп тущтын ут тананылн акваг эрыс. Ань сав нэквет тамле пормас нас пумыщ манос суссылтан магсыл юнтэгыт, ты пормас тананылн сака ат эри.

Татьяна Александровна тучаныт урыл ос потыртас. Пёс порат нэквет салы совныл юнтум тучан ощсыт. Ань сав нэквет тучаныт нуйныл юнтыяныл. Тамле пормасыт суссылтапын хунь кетыглавет, учёный ос ванэ махум тара лавегыт, пёс порат тамле тучан ат юнтыглавес, тыимагсыл суссылтапын ат вивет.





Татьяна Александровна ханты мир пёс йис вармаляныл сав тал ханищтыянэ ос савсыр нэпакыт ты урыл хансы.

Молты тал тав Сургутский районт ворт олнэ хантыт палт ялыс. Учёный нэ лавыс, ты щемьят ворт пес йис щирыл кос олэгыт, салы ўрегыт, хул алышлэгыт ос вораегыт. Агияныл ос пыганыл ёт туп щань латныл потыртэгыт.

Нявраманыл школа астлан юи-палт юв ёхтэгыт. Тувыл ты ханты махум савсыр пормасыт танки воссыг ат варегыт, ат юнтэгыт. Эрнэ пормасыт пуссын лапкат ёвтэгыт, ворт яныгман нявраманыл салын сун, ёсат, саграпыт ос мот эрнэ пормасыт варункве ат хасэгыт. Нэквет ханты маснут юнтункве хасэгыт кос, тувыл сахин сакныл яныг хансат варегыт. Пес порат та мат олнэ ханты махум тыщирыл ос ат юнсхатасыт.

Ань учёный махум ты вармалит урыл акваг потыртэгыт. Товат лавегыт, туп пес щирыл юнсхатункве эри, мотаныт номсэгыт, ань олупсав акваг мот щирыл емты, юнтсахтункве ос йильпи щирыл рови. Татьяна Александровна ты вармаль урыл такви номт ос оньщи. Тав лавыс, хантытн ос маньщитн пес махманыл щирыл мащтырланкве туп эри, ос тэла тал яныг ханса-капаит маснутын юнтункве щар ат эри.

Людмила ТЕТКИНА

ХАНИЩТАП

Нивхи латныл няврамыт ханищты

Матыр варыглаве. Ты тал щань латнанув янытлан ос та урыл потыртан магыс тасавит хонтхатыглап варыглавес. Ам акв нивхи нэ ёт вайхатасум, тав Сахалин маныл тыг ёхталас, танти ощнэ маснутыл масхатым олыс. Нивхыт – ты мощщаг хультум мир, тан савынпалэ Сахалин ма нупыл олэгыт. 2010 талт Россия янытыл махум наманыл нэпакн хансым порат, тонт тан ат сотыра арыгтем элумхолас ловиньтавес.

Татьяна Валерьевна Тубина Некрасовка павылт Охинский районт самын патыс. Тот яныгмас, школа астлас. Южно-Сахалинск ўст овыл классытын ялантан няврамыт ханищтан нэг ханищтахтас. Ювле такви павлэн ёхтыс, номсас, тот рупитанкве паты. Директорн лаввес, овыл класс няврамыт ёт рупитан хотпа товылхаты ос нивхи латын ханищтан элумхолас ат оньщегыт.

Маньлат аги хотщагтыс, тох тав такви латныл няврамыт ханищтанкве патсанэ. Нэ лави, институтт ханищтахтамет тав рущ ос нивхский латныг урыл дипломный нэпаке хансыс, тавён щань латне ёт рупитанкве сака пумыщ олыс. Тонт тав хансыс, хумус махманэ халт яныгмас ос омаге-атяге нивхи латныл ат потыртасыг. Тэн хот тал порат интернатн вуйвесыг, тот туп рущ латныл ханищтавесыт. Танти латныл потыртанкве ат тартвесыт, таимагыс юн рущ латныл ос ат потыртасыт. Татьяна щёмьянылт ат няврам яныгмасыт, пуссын туп рущ латын вагыт. Нэ тав щар маниг олы, щань латне хосыт рупиты ос латне вагтэ, нэпакыт щирыл ханищтастэ. Акв порат тан школанылт няврамыт щань латныл щар ат ханищтавесыт, ётыл ущ ханищтанкве патвесыт.

Татьяна Валерьевна такви рупататэ урыл тох потыртас:

– Aм хōтхуйплов тāл школат рупитэгум, лов тал няврамыт амти латнумтыл потыртанкве ханищтасанум. Тувыл директорумн лаввесум, мань няврамыт ёт вос рупитэгум, атинк мощертын щань латныт урок щирыл ханищтанкве ат тартавет. ФГОС щирыл щань латныл хансым учебникыт пёсыг ёмтсыт, тан хосытанылт латын ханищтанкве ат вермев. Ам касащасум ос ань мань няврамыт ёт рўпитэгум. Ты коныпал урокыт астынэныл юипалт овылныл ос нёлолов классыт ханищтахтын няврамыт ам палтум ёхталэгыт, ман щань латнув тан ётаныл ханищтэв.

Ман школа-интернатыт рупитэв, тот 113 няврам ханищтаве, тан халанылт нёлсаттем нивхыт. Сартын сав няврам олыс, мот павлытныл тув тотыглавесыт, ань тысавит ты туп хультыс. Махманув савынпалэ хул алыщлым, ворт матыр катынпаттым щемьяныл тыттэгыт. Москалёвка павыл налыман верыстат олы, тувыл няврамыт касын хотал автобусыл ман школавн тотыглавет. Пес порат школав национальныиг олыс, ань тай ати. Лёнхув люль, щёмлы-хомлын кос, ос тох хотмус няврымт та тотыглавет.

Ман мавт нила сотыратем нивх хотпа олэгыт, тан халанылт туп 3-4% щань латныл потыртэгыт. Ты савынпалэ нёлсат талыл яныгнув экват

ос ойкат, маньлат ос тувыл яныгнув махум танти латнаныл ат ваганыл, ат потыртэгыт. Амти потыртанкве ос ат вермегум, нэпакыт хосыт латнум ханищтаслум.

– Манхурип ханищтахтын нэпакыт оньщегын?

- Ман 1982 тал порат таратым 1 ос 2 классыг магыс нэпакыт оньщев. Ос ань 4 класс магыс ос азбука-нэпак таратавесыг, тыитыл ты ханищтыянум. Хабаровский крайт олнэ нивхыт савнув нэпак оньщегыт, тан нэпаканылтыл ман ос ханищтахтэв. Ман мирувныл Людмила Борисовна Гашилова Санкт-Петербург ўст А.И. Герцен нампа институтт рупиты, тав эрнэ нэпакыт тараты.

– Нанти щёмьян урыл мощ потыртэн, нявраманын янгыт?

– Ам яныг пыгум онтоловит класс астлы, мань пыгув сатыт класс. Ам тэнатэн хотати ёт выгагум, латнув, культурав вос вагтэн. Манти рутанув урыл вос вагтэн, ман мирув пуссын яныг рутыл **олсыт.** Ялпын хоталыт варыглэв, няврамыт ёт мойтыт ханищтэв, тананыл мир элы-палт суссылтыянўв. Маньнув пыгумн ты вармаль пумыщ, яныг пыгум тай акваг похыннув та лакви, ат пумщалахты.

Мот мирытныл олнэ няврамытын тыи ос сака пумыш, тан касащим ман ётув ёнгасэгыт. Латнув ханищтан порат ам тананыл ёнгалтым ханищтыянум, тананылн тох пумыщ ос латнув молях торгамтыяныл.

Галина КОНДИНА



РЎТЫГ ОЛНЭ МИРЫТ

Финно-угор рутанув муйлункве ёхталасыт

Янк натнэ этпос 21-24 хоталыт Ханты-Мансийск ўст «Финноугорская весна — 2019» нампа фестиваль маньлат махум магсыл варыглавес. Ты вармаль ханищтап щирыл рупитан Министерство ос финно-угорский университет Ассоциациятэ щёпитасыг.

Маньлат агит ос пыгыт Удмуртия, Мордовия, Мари Эл, Карелия, Коми Республиканыл, Ямалныл, Санкт-Петербург ўсныл, Новосибирск ўсныл ос сав мот маныл тыг вовыглавесыт. Ханты-Мансийск ўст ты фестиваль овыл щёс рупитас.

Муй махум янытланкве округ яныг кущай нэ Наталья Комарова ёхталас. Тав лавыс, финно-угрыт пес йис тагыл рутыныщ олэгыт. Россия янытыл ань 25 млн финно-угор махум олэгыт. Тан пуссын танки йис вармаляныл ат ёрувлыяныл ос элаль тотыяныл, щань латнаныл ханищтэгыт ос потыртэгыт. Рутыг <u>олнэ</u> мирыт халанылт вайхатэгыт ос акван-

юрщхатым олэгыт.

Мот хон маныл ёхталам рўт махманув

Ялпын хоталын венгр-рутанув ёхталасыт. Чрезвычайный ос Полномочный посол хум Норберт Конкой маньлат агит, пыгыт ос янытласанэ. Тав сав ёмас, сымын латын лавыс: «Паща олэн, ятил рут махум! Ман, венгрыт, Европа мат хащтал мирыг ловиньтахтэв. Ман мот латныл потыртэв, мот культура оньщев. 18-19 нот порат учёныянув тыт **ОЛНЭ МИРЫТ ОЛУПСАНЫЛ** ханищтасаныл ос тонт торгамтасыт, нан ётын ман сака ляпа рутыг олэв. Ты вармаль урыл ман щар ат ёрувлэв».

Фестиваль рупитам порат тыт савсыр конференцият, ханищта-



суссылтапыт варыглавёсыт. Овлэт яныг сапрани олыс. Маньлат агит, пыгыт ос ханищтан хотпат щань латныт элаль тотнэ вармаль урыл тот потыртасыт. Ань Россият пирмайтым сакконыт щирыл школан ялантан агирищит, пыгрищит щань латнаныл урокыт оигпан юи-палт ханищтанкве туп вермегыт. Тувыл тох латын ханищтанкве нэмхотьют ат касащи. Ты тарвитын вармаль ань Россия янытыл олы. Маньлат агит-пыгыт танки латныл ос сака ат пумщалахтэгыт. Щань латныт хумус ханищтанкве, манхурип сакконыт, программат пирмайтанкве ань эри, яныг сапранит махум потыртасыт.

Ты юи-палт «Культурное наследие» нампа площадка рўпитас. Савсыр маныл ёхталам агит, пыгыт танки потраныл тот ловиньтасыт.

Тувыл муй махум маньщи ос ханты щирыл ййквункве, мащтырланкве ханищтавесыт. Тимофей Молданов пыгрищанэ ёт тулыглапыт суссылтас, Маргарита Рябова агит ййквункве ханищтасанэ.

Анатолий Вадичупов санквылтапыт хумус вариянэ, та урыл латын лавыс.

Пирмайтым сакконыт урыл ос вос вагыт

«Молодёжь – будущее российского Севера» нампа площадкат маньлат хотпат ос Россият пирмайтым сакконыт урыл потыртасыт. Ань сосса махум магсыл савсыр сакконыт, программат рупитэгыт. Пес йис вармалит элаль тотнэ вармаль ос щань латныт хаништан магсыл акваг сав олн тастыглаве. Маньлат махум ты сакконыт урыл щар ат ванэныл. Ты эрнэ рупата элаль хумус варункве эри, та урыл тан тот китыглавесыт.

Удмурт махум «Онлайн Удмуртия» нампа ханищтап урыл потыртасыт. Ань маньлат махум ищхйпын утыт «ВКонтакте», «Одноклассники» ос мот мат танки латныл туп хансэгыт. Тыимагсыл сав агит, пыгыт щань латын ханищтанкве касащегыт. Мот финноугорский мирыт тамле ханищтапыт варункве ос ань номсэгыт.

Аквта порат «Язы-





ковая ситуация и языковые контакты в XMAO-Югре» нампа конференциян савсыр учёныит акван-атхатыгласыт. Ты вармаль Софья Онина, ЮГУ рупитан ханты нэ, 50 талэ товлын кастыл щёпиталвес.

Āгит магсыл касыл олыс

Фестиваль олум порат «Мисс студенчества Финно-Угрии – 2019» нампа касыл варыглавес. Савсыр финноугорский университетт ханищтахтын агит: Юлия Сунцова, Юлия Кинякина, Маргарита Кутасова, Екатерина Марченко, Татьяна Климова, Анна Махотина, Ольга Ашихмина тыг ёхталасыт. Югорский университетт ханищтахтын ханты аги Елена Шуганова ос тан ётаныл касыс. Елена Белоярский район Касум павылныл олы. Тав Югорский университетт нилыт курсыт психологыг ханищтахты.

Овыл хоталэт агит «Торум Маа» нампа музейн ялсыт. Тан маньщи ос ханты культураг урыл тот потыртавёсыт, хул исмитыл пайтыглавёсыт ос щаил айтвёсыт.

Мот хоталт тан ляххал тотнэ хотпат ёт хонтхатыгласыт. «Ханты ясан» нампа газетат рупитан нэ Ирина Самсонова щань латын агит вагыт ман ати, та урыл пумщалахтас. Сат агит латнаныл ёмащакв ваганыл, туп Елена Шуганова лавыс, ханты латын тав торгамты, потыртанкве ат хасы. Нётнэ агит супаныл урыл китыглавесыт, манхурип хорамыт, хансат супын юнтым олэгыт. Kасың аги нохлюлюмталыс, супе суссылтастэ ос юнтым хораманэ, хансанэ урыл потыртас. Агит мащтырланкве пуссын хасэгыт, акватэ сакныл харты, мотанэ суп юнтункве верми, хурмит хансан щулкин саги.

Жюри-хотпат ос Финно-угорский махум Ассоциацияныл урыл агит китыгласаныл, хоты порат ос хоты ўст рўтыг олнэ мирыт Конгрессын акван-атхатэгыт. Агит ты урыл щар нэматыр аты вагыт. Тонт Татьяна Барахова тананылн лавыс, Финно-угорский мирыт Конгрессаныл Эстония мат Тарту ўст 2020 талт тах вараве. Тамле нётнэ ос номтын агитын, ты эрнэ тэла урыл ос пумщалахтуңкв эри. Кущай нэ ос лавыс, ты яныг сапрани варнэ махумн пищма тах хансы, ты нётнэ агит тув ос вос вовыглавет. Ос Эстония ман атхатункве пуссын лавсанэ.



Нётнэ супаныл суссылтасыт

Хурмит хоталэт агит «Югра-Классик» нампа колн вовыглавесыт. Тот тан махум ос жюри элыпалт нётнэ маснутаныл суссылтасыт, танки олнэ мананыл урыл потыртасыт, эргысыт ос ййквсыт. Жюри-хотпат тан халанылт щар нётнэ ос номтын аги периясыт.

Финно-Угорский центр кущай нэ Татьяна Барахова, Творчество кол кущай нэ Елена Исламуратова, депутат-хум Александр Новьюхов, ляххал тотнэ хум Виктор Журавлёв ос федеральный агентстват рупитан хум Сергей Тимошков жюри-хотпаг олсыт.

Татьяна Барахова ты урыл тох лавыс: «Ты касыл ман нёлолов тал сыс варыглылув. Агит ати нас тох тыт нётылтахтэгыт ос супаныл суссылтэгыт, ман сунсэв, щань латнаныл вагыт ман ати, танки эрганыл ос ййкваныл вагыт ман ати. Ос ты юи-палт туп щар номтын ос нётнэ аги пёриёв».

Овлэт агит послым кинаныл танки олнэ мананыл ос ханищтахтан университетаныл урыл суссылтасыт. Елена Шуганова Касум павылт олум салын махум ялпын хоталаныл урыл кина послыс.

Ты юи-палт агит ос танки супаныл суссылтасаныл. Тувыл касын аги щань латныл эрыг эргыс, потыр потыртас манос стих ловиньтас. Елена Шуганова Ас-угорский театрыт рупитан маньщи, ханты агит, пыгыт ёт эрыг эргыс ос санквылтапыл санквылтас. Ос тувыл тан нётнэ рущ супыл масхатасыт ос жюрихотпат элы-палт ёмыгтасыт.

Нёлолов агит халт Маргарита Кутасова нох-патыс. Тав Марий Эл мат Йошкар-Ола ўст олы, Марийский государственный университетт нилыт курсыт ханищтахты.

Жюри-махум лавсыт, Маргарита такви яныгмам матэ урыл сака пумыщ кина послыс, ёмас эрыг эргыс, ййкв ййквыс, тыимагсыл овыл местал та майвес. Мотыт щёс ты касыл нох-патум аги олнэ ўсэт тах варыглаве. 2020 талт финно-угорский нётнэ агит Йошкар-Ола ўсн касункве тах вовавет.

Югорский университетыт ханищтахтын аги Елена Шуганова «Вице-Мисс «Мисс студенчества Финно-Угрии – 2019» намыл майвес.

Людмила ТЕТКИНА

СОССА МИР ОЛУПСА

Мирн нётмил варнэ колыт

Мирн нётмил варнэ департамент мощща олн сэлнэ сосса махум магыс латын кеты. Ань хоты тэланылт государство палыл тан онтас варёгыт, ты урыл ваён. Тамле вармалит «Устойчивое развитие коренных малочисленных народов Севера» нампа округ программан хасвёсыт ос №350-п постановлениенэпакыт 18.10.2018 талт пирмайтавесыт.

Сосса махум танки олнэ мананылт мирн нётмил варнэ колт рупитан хотпат палт вос ялэгыт ос тот олннётмил винэ магыс нэпаканыл вос атэгыт. Та программан тамле накыт хансым олэгыт:

- элумхолас хотталь пусмалтахтын магыс тыгле-тувле ялнэ лёнхе ювле ойтаве, тал сыс туп 20 сотыракем солкови савит;
- няврамыт маснутыл ёвтнэ магыс: мань няврам – 5 сотыра сол-

ковил таставет, школан ялантан няврам – 7 сотыра солковил;

- мот мат хотталь шалтнэ хотпа такви матэн тотнэ магыс 8 сотыра солкови ойтэгыт ос таве тотнэ элумхолас 9 сотыра лёнх олныл миве;
- няврамын ўщлахтын ман кетылын ке лёнх олнытыл туп 20 cōтыракем солкови ювле ойтавён тах.

Ань пуссын ты вармалит урыл матыр тарапаттын латын оньщегын ке, нан мирн нётмил варнэ департамент колн свонитэн. 8(3467) -**329-327** телефон хосыт Марина Андреевна Хорькова, тот рупитан нэ, китыглэн ос тав ётэ вармалянын овылтыт потыртэн.

Тувыл хотты колтаглыт сав тал акв мат рупитасыт манос акв хотты профессият рупитам махум янытлан матыс ос элумхолас 60 талэ товлынэт порат (тыгыл элаль касын ат тал тах товлынэт порат) ос нётмилыл варавет. Ты махум магсыл социальный службаколт ялпын хоталыт щёпиталавет ос тот янытлавет.

Ань ты тэлат тарапаттункве эрегыт ке, нан 8(3467) 320-289 телефон хосыт Ирина Николаевна Ильина ёт потыртанкве вермегын.

Мот «Социально-демографическое развитие» нампа постановление-нэпак щирыл №339-п 05.10.2018 талт тав хасвес, вор мат акваг олнэ сосса щемьят няврам самын патнэтэ порат 20 сотыра солковил мивет. Ань ты вармалит танки олнэ манылт мирн нётмил варнэ коланылт тара вос паттыяныл.

Пуссын ты ляххалыт «Центр социальных выплат Югры» кол манавн кётыс. Тав телефонэ **8(3467) 337-187**, тувыл ищхипын лопс хосыт http://csvhmao.ru/ матыр латын хансункве вермегын.

> Кётым ляххал маньщи латныл

Т. МЕРОВАН хасвес

Рутанэн 55-талэтл янытлаве



Хурит Светлана Тихоновна Ломакина пос-

район Саранпавылт самын патыс, такви лым олы, тав Хальус опарищ наме Анемгурова олыс. Светлана школа астламе юи-палт Салехард ўсн минас, тот училищат радистаг ханищтахтас ос ювле ёхтыс.

Саранпавылт щемьяныг ёмтыс, ойкатэ Александр Степанович Ломакин сав тал «Сосьвинский экспедицият» нёрт яласым рупитас ос тувыл пенсиян патхатас. Светлана Тихоновна «Оленёнок» нампа мань няврам колт тэнут пайтнэ нэг сав тал рупитас ос ётылнув аквта мат завхозыг паттувес.

Ущлахтын порат тан щемьян тагыл нёрт яласэгыт, тот ўщлахтункве тананылн сака мусты, аквъёт хул алыщлэгыт ос пил ватэгыт. Иван пыген пассан щахнил касункве ханищтахтас, хот-ати

касункве ялантас. Ань «Мань Ускве» нампа ман ёхталан агит ос пыгыт нёрн тотыгланкве нёты. Светлана Тихоновна таквинатэн ос Валя юртнэтэн маньщи суп юнтыс. Ос тованакт «алмазная мозаика» вармальт савсыр хорамың хурит вари.

Янк натнэ этпос онтолов хоталэт Светлана Ломакина 55 талэ товлыс. Ань тав урет Валентина юртнэтэ потыртас. Пуссын рутанэн, руманэн тав намхоталэ кастыл янытлаве ос сымн ровнэ латын кётэгыт. Ман, газетат рупитан хотпат, таве ос янытлылув, пус кат, пус лагыл, Торумн ос Най-Отыранэн вос ўргалаве.

> Тамара XATAHEBA

СОССА МИР КУЛЬТУРА

Салын хум вораи ос хул алыщлы

денис Григорьевич Кантеров, ханты хум, Лянтор ўс ляпат такви матэ тармыл олы. Тав матэ мўвлахи «Сургутнефтегаз» махум маныл ма-вой нох-выгыт. Хум тот «Нижнесортымский» нампа месторождениян рўпитанкве патхатас. Тот ат хотал рўпиты, ат хотал ос юн ўщлахты.

Ты щёмья яныгсаткем салы оньщёгыт. Ворын мананыл яныг, тот салыяныл тэлы мат ос туи мат олэгыт. Тэлы порат салыт танкирот ёмыгтэгыт, хоталь касащёгыт, тув та минэгыт, нас уральтым оньщавет. Тананылн тэп ёмщакв товылхаты.

Туи кастыл салыяныл я хосыт алгаль посыяныл. Тот ловманкем верыста палыт ос панвхит щарк оньщегыт. Та маныл мувлахи пусасыл варсаныл. Та пусас кивырт салыт ёмыгтэгыт, туяг пасыг унттэгыт. Воруитн ул вос новвесыт ос сака лакква ул вос миныгласыт, пастухытн акваг уральтавет.

Хум олупсатэ урыл тох лавыс: «Ворт воруй мощща олы. Туяг васыт, лунтыт ёхтэгыт. Ты товлын улт патлуптым ялантэгум. Тувыл ты нёвлитыл ман тэлы кас-

тыл тушёнка панкат варев. Вор суянувт ань ты накт туп ятрит, анхат хультсыт. Юи-овыл кит талыг сыс ман мавт щёпыр морсын порат ликмыглы, щар мощщаг емтыс.

Янгўит туп туи порат ёхталэгыт. Тованакт туи сыс хўрум-нила янкылматын нэглалэгыт ос пилэгыт, ляпан ат майхатэгыт. Ты ўй ос мощща хультыс. Ань савсыр мат лёнхыт варвёсыт, машинат яласэгыт, тыимагыс улпыл савынпалэ янгўит эл минэгыт. Ман тананыл катын ат паттыглыянув.

Маколынойкат тай мощ нэглалэгыт. Тан салыт ат кос новияныл, туп хурум тал ювле хультум порат туйт хосыт акв маколынойка ёхталас. Акв пасгын салы понигталыстэ. Ос тамле вармаль морсын порат емталы. Тавен

ворт ватнут товылхаты. Хул, пил, лахыс, матырати пуссын олы. Тыитыл лащал таквирот ваташлы».

Денис Григорьевич экватэ Екатерина Андреевна Кантерова, такви опарищ наме Сенгепова, тав юн колсори рупата вари. Тэн кит няврам Карина ос Леонид янмалтэг. Ты нэкве ойкатэ, нявраманэ ос такви магсылэ хорамын, нётнэ маснутыт мащтырыг юнты. Лянтор уст салыл каснэ вармаль олыглан порат нэг-хумыг тот ватихал нох-патыглэг. Тыимагыс тэн сака янытлавег ос муйлуп-сал муйлупталавег.

Салын хум лавме щирыл, нефтяникыт тан мананылт хосат тагыл рупитэгыт. Тан аквъёт договор-нэпак щёпитасыт. Тот сосса махум эрнэ тэланыл урыл ёмщакв хансым олы. Тан нила тал сыс акв щёс «Бураныл», лов тал сыс акв щёс керхапыл, хот тал сыс акв щёс моторыл, най постын станциял нила тал сыс акв щёс майлавет. Ты вармаль танки манылт олнэ сосса махумн яныг онтас вари.

Тувыл хурум этпос сыс акв щёс акв сосса хотпа нила сотыра атсат солковил компенсация-олныл ойтаве. Ос хотьют нефтяникыт палт рупиты, тан тамле нётмилыл ат мивет. Ты коныпал «Буран» манос матыр мот ут винэ магыс налок-олн ойтункве эри. Ты налок-олн компенсация-олнытыл ювле пуваве. Тыимагыс тан ты олнаныл аты ващиньтыяныл.







Николай МЕРОВ

СОССА МИР КУЛЬТУРА

Ёмас ялпың хотал янытлавес





уи пора ты ёхтыс ос лупта этпос овыл щислатэт няврамыт 👢 ўргалан мирхал ялпын хоталыг олы. Тонт няврамаквет янытлавет ос савсыр щирыл ёнгалтавет. Ханты-Мансийскат «Торум Маа» музейт рупитан хотпат «Ворщик хотал» варыглэгыт ос карс канын муй хотпат вовегыт. Ты порат тан ворщик ўйрищакве варнэ ялпын хоталаныл лов талэ та товлыс.

Ань музейт рупитан хум Вячеслав Кондин муй махум ёт пащалахтас ос манырсыр касылыт щёпитасыт, потыртас. Тот няврамыт ворщик хурит катыл варсыт ос партыл варим хуритэ ольпыл сартсаныл, мот кант агирищит-пыгрищит танки халанылт касункве манос ёнгункве вовыглавесыт. Туи колт

мультфильмыт сунсункве ровыс. Тувыл акв хара мат мань йивквет ўнттункве вёрмысыт.

Ты порат ати сака сав мир тув атхатыглас, ос хотьют тув ёхталасыт, пуссын матырати варункве ёмщакв ханищтавесыт. Овлэт кон раквсамыл пасгункве патыглас, няврамыт послум утаныл ала ты

ёсвёсыт. Агирищитнпыгрищитн ракв тай пилыщман ати, тан элаль ёнгегыт, хайтыгтэгыт. Тувыл тахольт хоталыныг емтыс ос ялпың хотал элаль варвес.

Тот ворщик овылтыт мойтыл мойтвесыт, махум палт кит нэг ворщикыг масхатым ёхталасыг ос тэн ётэн яныг щаниг намаим эква потыртас. Тан няврамыт стихыт ловиньтанкве, амщит амщункве ос ййквункве, эргункве сценан вовиньталсаныл.

Мўй махум магыс Ангелина П. «Куринька» эрыг ханты латныл эргыстэ. Мот агирищкве Дарья Н. «Точка, точка, запятая» эрыг эргыс. Тувыл няврамыт магыс эргыглам савсыр эргыт «От улыбки», «Песенка Мамонтёнка» Светлана Менделева эргыс, ос «Антошка, Антошка» эрыг тэн Сергей Ремизов ёт пумщиг эргыстэн. Тот яныг хотпат танки мань няврамыт хольт тан ётаныл эргысыт ос ййквсыт.

Няврамыт касманыл магыс магын конпеткал майвесыт ос тувыл пуссын муй махум атын нянь ёт щаил айтвесыт.

Ань тув сыс няврамаквет ёмщакв вос ущлахтэгыт, сав малтып, посын хоталыт вос олэгыт, ос матыр тахнэ номтаныл тэлаг вос емтэгыт. Пус кат, пус лагыл!

Тамара МЕРОВА







Лўима сэрипос (Северная заря) №11 (1197), 06.06.2019 Соучредители Дума, Правительство Ханты-Мансийского автономного округа – Югры Издатель

Департамент общественных и внешних связей Ханты-Мансийского автономного округа – Югры

Редакция

Врио директора Кондина Г.Р. Телефон (3467) 33-22-72

Заместитель гл.редактора -Кондина Г.Р. Телефон (3467) 33-22-72

Ответственный секретарь Узель В.В. Телефон (3467) 33-23-09

Алрес релакции и излателя: 628011, г. Ханты-Мансийск, ул.Комсомольская, 31 тел./факс (3467) 33-17-52

E-mail:gazeta@khanty-yasang.ru Газета размещена на сайте www.khanty-yasang.ru

Отпечатано:

ООО «Новости Югры-Производство» г. Сургут, ул. Маяковского, д. 14

Индексы 04399, 54399 Тираж **1710** экз. Заказ **2463**

Цена свободная

Мнение авторов публикаций не обязательно отражает точку зрения редакции.

Газета зарегистрирована Управлением Федеральной

службы по надзору в сфере связи, информационных технологий и массовых коммуникаций по Тюменской области, ХМАО-Югре и ЯНАО.

Свидетельство о регистрации ПИ №ТУ 72-00795 от 23 января 2013 г.